



QUÆSTIO MEDICA,
CARDINALITIIS DISPUTATIONIBUS
MANE DISCUTIENDA
IN SCHOLIS MEDICORUM;

Die Jovis 16 Martii 1719.

M. PHILIPPO FONTAINE, Doctore Medico,
Præside.

An ex labore, Medici vita longior, felicior?

I.

ARS Medica ut cæteris Artibus omnibus præstantior, quia Medicum, quasi Dei ministrum, facit; sic & maximè necessaria, cum homo totus sit à naturâ morbus. Ars istac nobilis Imperatoribus ipsis imperat. Illam olim exercebant Principes, Reges quibus ut sua, sic & Populorum suorum salus atque vita cordi erat, seque Medicos profiteri minimè renuebant. Nunc quoque Reges nostri curant, ut & exercitiis & Urbibus suis dentur Medici studio, doctrinâ, arte suâ spectabiles: volunt ut dignitate, autoritate apud se valeant, atque quàm maximis præmiis afficiantur ii, quibus suam credunt sanitatem.

Longa & difficilis Ars Medica, nec nisi continuo atque indefesso labore acquiritur, exercetur; sed Medico non inutilis labor, labori par fortuna. Fortunati homines qui longævi super terram & felices esse possunt. Tales præ cæteris omnibus Medici, quorum laboris merces & tranquillitas animi, & corporis robur ex quibus longior atque felicior vita.

I I.

TRANQUILLITAS animi quæ in hac vitâ comparari potest, non quærat in otio quod ipsi labem infert, non in voluptatum fallacibus illecebris, sunt enim malorum seges, nec in eis ullus virtuti locus. Tranquillus animus virtutis amans est, nihil sibi conscius, non in litibus, non in turpibus aut intricatis negotiis tempus terit, non tenet ipsum divitiarum sitis in exhausta, hæc non tam honestati quàm improbitati serviunt, & instigant ad voluptatem. Medicus qui ætatis degendæ sibi genus honestum elegit, vult quidem laboris sui lætitiâ, sed ante nummos virtutem ponit, & contentus parvo vivit. Cum junior libris impallefcit, nullo labori parcit ut famæ consulat, ut hominem noscat, & à quibus tum malè affici tum sanari possit; noscat intimum quod est, & necessarium animum inter atque corpus commercium, cumque videat hæc duo à sese mutuo pati, ne corpus suum ab animi pathematis patiatur aliquid, aut à corporis morbis animus afficiatur totus est: studet semper ut sui juris sit (quo nihil jucundius in vitâ) ut possit de omnibus benè mereri aliquando, omnibus prodesse, nemini nocere, quin & sibimetipsi (si res unquam exigat) mederi, quo utilis nihil. Si quæ fortè pathemata animum turbare voluerint, hæc moderatur statim & compescit, nec sinit se irâ efferri, ardescere; mœrore, invidiâ tabescere, consumi; amore languere, pereunt in illo arcus cupidinis, nam musis deditus, nec otiosus. Gaudet esse animo forti & tranquillo, quia optimum contra morbos, etiam maligniores, antidorum, & indè corpus ad functiones suas obeundas aptius robustius.

I I I.

VARIÆ sunt corporis nostri functiones, illarum nonnullæ intra corpus fiunt, terminantur & ob id internæ dicuntur, sic coctiones, filtrationes, secretiones: quædam ex-

ternæ, ut motus localis, & externi sensus. Nullæ sine motu, & pendent omnes à partibus. Mirum quot partes quibus corpus nostrum constituitur. Solidæ aliæ, aliæ fluidæ. Utræque æqualis necessitatis, & opem mutuam sibi præstant ad vitam. Solidarum elater à fluidarum itu, reditu, aut indefinenti circuitu pendet & servatur. Fluidarum motus à solidarum elatere juvatur. Quæ effectuum istorum prior causa, inter se disputant Medici: non aberrabunt qui fluidis primatum tribuent. Hæc in primâ formatione sibi alveos cudunt. Punctum non salit in fœtu nisi à rubicundo sanguine. Primus machinæ nostræ formator spiritus qui ipse flos est sanguinis tenuissimus. Ut motu corpus nostrum formatur, ac partes singulæ disponuntur; sic motu postea ad functiones suas aptius fit & robustius.

IV.

MEDICUS qui scit quanta ex labore corpori nostro veniant commoda, ignaviam illud debilitare, laborem firmare, illam maturam senectutem, hunc longam adolescentiam reddere, exercitationem fidissimum esse sanitatis cultorem; mulieres plerasque, quia torpent otio, sæpius morbis tentari; voluntariè ac paulò vehementiùs corpus suum exercere non reformidat (etiam in provectiori ætate). Labor enim cui quotidie assuescimus, & quem cum voluptate ac lætitiâ suscipimus, nec immodicus, nec nocivus esse potest: immò isto labore roborantur partium fibræ; sanguinæ moli nitor conciliatur crassioribus particulis quibus impedita sæpiùs est attenuatis; incernicula corporis præter quæ trajiciendus est ille liquor reddit ampliora, patentiora, indè liberiùs permeat sanguis, spiritus animales (qui revera existunt) in cerebro faciliùs à reliquo sanguine separantur impetum facturi ad singulas partes, ut in singulis actionum sint præcipuæ ac potentissimæ causæ.

V.

PRÆTER hæc quæ corpori eveniunt commoda assiduo & quotidiano labore seu motu, insensilis transpiratio longè uberior procuratur, propter quam excrementis immune corpus redditur. Miretur jam quisquam? Medicum (etiam cui non meliori luto sunt præcordia) sese quotidie, non quidem ad lassitudinem exercere, movere, cum videat Medicus longam &

felicem vitam obtinere posse homines qui impigri sunt ad laborem, nec replentur cibis. Omnis repletio mala, quia gravat corpus, & ad laborem ineptum reddit. Quærant Pharmacum immortalitatis fratres illorum qui lapidem Philosophicum quærunt? Medici satis felices arte suâ, quâ discunt diu vivere & salubriter. Medici multi quidem nomine, reipsâ pauci; verè enim Medici sunt qui, cum possent aliis prodesse, sibi non nocent; qui utuntur rebus non naturalibus omnibus, sed moderatè & convenienter ad suam temperiem atque naturam; quibus animus serenus, hilaris, à curis, pathematibus liber corpori non officit; quorum corpus labore ad obeundas functiones aptum fit quotidie & robustum. Illi firmiori gaudent sanitate quæ vitæ condimentum est optimum, quâ nihil miseris mortalibus carius, & longævi super terram ac felices esse possunt homines.

Ergo ex labore, Medici vita longior, felicior.

Proponebat Parisiis LUDOVICUS-SIMON
EMMERÉZ, Parisinus, Baccal. Medicus.

A. R. S. H. 1719. A sextâ ad meridiem.